

四庫全書

集部

欽定四庫全書

集部

崧菴集卷

四至  
六

詳校官石中允臣薩敏

主事臣呂雲棟覆勘

膳錄監生臣徐元秀

膳錄監生臣董誠

欽定四庫全書

松庵集卷四

宋 李處權 撰

五言律詩

西亭

江南形勝地列坐肆遐觀  
氣象天圍大溪山眼界寬  
遠風來綠野返照上朱欄  
更待秋澄澈重尋落帽歡

簡彥冲兄弟

過午時雲簇膏春暝雨從石苔先受色  
桃葉復含滋客

舍居難穩家書到每遲二公俱強飯宗社要扶持

簡江二十丈

旅泊桐廬郡溪山過所傳稍寬遊子恨知有丈人賢水  
落魚鰕聚林踈橘柚懸淹留拚宿醉卧扣月中船

戲簡秦處度

淮海秦夫子相逢又十年好詩無漫與愛酒不虛傳夜  
寺雲連榻秋江月滿船不知嵇叔夜何得絕交篇

簡知章

野老元同社柴門不上關喜君捐俗事令我破愁顏宿  
雨生流水春雲媚遠山何當事鷄黍把酒坐忘還

道夫惠詩為和五首

飯已抄雲子盃仍致麴生青梅方弄色黃鳥已無聲世  
態窮尤見吾心老更明從來文字飲意不在傾城

獨醒非我事多難亦吾生將相知無種文章怕有聲且  
當乘款段無復謁承明使我忘羈旅絃歌近武城

山雲談次改溪水坐來生白鳥飢逾靜蒼蠅飽不聲令

君真子產墨客陋彌明回首人間世塵埃望赤城

不恨青春去唯愁白髮生日長宜燕乳水滿自蛙聲念我心方逝逢君眼漸明剛腸三尺劍光彩動豐城

水陸勞千里詩書誤半生山開南國翠鳥已故園聲會是豺狼靜方瞻日月明牽羊今古恨洒血望占城

士特倒用韻作元日復和

覓醉無干日浮家又一春閒門久羅雀貧甑自生塵我欲論秦過君須賦洛神窮途依二阮遂欲老於閩

再和

鬢絲殊覺老淚血更傷春閱世元如夢除天總是塵有  
心耽傳癖無意媚錢神坐怪三衢守書來不到閩

元日聞養源文少醉詩以簡之

南州新歲換北客長年悲吾日且三省我生仍百罹谷  
深雲不起樹暖蝶先知聞道山翁醉何如卧雪池

同二三子步溪上

已恨春風過猶欣夏日長鶯喧桑已葢燕乳麥初芒白

髮悲如許青鞋樂未央歸來安客舍更有北牕涼

謝翁養源惠醋

已著蓮花釀仍兼竹葉醅橙和致上味蚶聚見良材政  
想攢眉漉須煩掩鼻開先生元自立不是乞鄰來

見懷

飄零吾老矣詩酒得斯人邂逅干戈際慙慙骨肉親錦  
囊元絕俗瓊樹舊無塵歸棹荷花裏從誰問玉津

陪諸友野步



北客身將老東風又歲華山晴添氣象水暖莫津涯  
貪覺他鄉苦慵嫌去路斜昇平吾會見時事不須嗟  
淹留傷老眼放曠適閒心石淺出佳色鳥幽傳好音  
課詩空自切饋酒莫辭深更說溪西寺明朝款款尋

偶坐西齋陪介卿賞卿嘉話久之成詩

靜聞簷際雨密障坐隅風竹晚葉時墮梅疎香欲空  
芝蘭室自好文字飲誰同它日功名事應從筆硯中

夜雪偶書

歲晚山雲合窓鳴霰雪飛方欣樽有酒未嘆篋無衣谷  
香青松健林空綠萼肥月明溪上醉應是夜深歸

澹軒

野鶴元同性晴山正滿門那知有城市初不異丘樊水  
靜嫌風撓花開畏蝶喧應當如是觀客至亦忘言

題嚴公祠

掛席上桐廬溪山似畫圖斯人不復見吾道一何孤誰  
入非熊夢真成失馬徒清風端未泯猶可激貪夫

守歲用少陵阿戎家韻寄懷蕭國器

節物賴鄰家南風競剪花門無迎客犬  
地有噪人鴉病  
眼愁中暗題詩醉裏斜亂離俱老大  
今夕意何涯

新歲偶書呈諸友

已見王正月陳人百不知紅顏豈長好  
白髮已多時  
臘雪微霑土春風小動帷丘之禱久矣  
何意問祥祺

東亭

簷屋排空濶薰風眺晚晴閒雲連樹碧  
白鳥破烟明  
世

亂思君子身危仗友生祗應今夜月解識故鄉情

桃花

照水桃花樹春風灼灼開雖非天上種何異觀中栽帝  
子吹笙罷漁人信棹迴故園何處是目盡望鄉臺

挽許主簿

攘攘誰逃死黃泉不獨君一官書載考五舉擅多文異  
日遼東鶴當年冀北羣承家知有子翮就看摩雲

長橋

徙倚長橋上時難得此遊水光迎目動帆影上天浮不見  
鴟夷子須煩顧虎頭今年閏八月好好醉中秋

和彥冲同原仲過交溪橋頭

不識交溪路詩來錦繡重間雲時出岫落日更明松  
夜常為鍛淵明亦近農喜君機事息魚鳥故相容

和劉逸老題羅漢壁間韻

僧房元寂寂客意遂陶陶詩筆翻雲錦茶甌捲露濤  
歸寒日下雪盡遠峯高尚喜王喬近吹笙坐碧桃

再和

已着詩招隱何須酒引陶  
胸中有涇渭筆下足波濤  
世亂閉門早身閒倚枕高  
何慙少陵老鸛鷀啄金桃

題月山寺壁三首

故國三千里行藏豈問天  
雪峯明的水溜響涓涓  
指凍無完甲琴寒有折絃  
老僧如木石性靜不須禪  
罷雪仍迴雨僧房物物宜  
谿明霜落後山淨月來時  
泯默窮愁志艱難食菜時  
弟兄千里隔書斷鬢成絲

不遇彭夫子何因到此間  
無窮霜後木不斷雨中山  
祇恐高僧占多慙倦鳥還  
孤雲在寥廓容望不容攀

題隱居

淡泊幽人趣蕭條隱者居  
踈簾隔花竹淨几展圖書  
自向交游密何拘禮法踈  
為言陶靖節吾亦愛吾廬

贈彥先

此地堪營屋何山更採薇  
怪松擎石出好鳥傍人飛  
衰相年來見幽尋亂後稀  
郎君似冰玉令我亦忘歸

偶書譏武團練

干祿謀何拙求人計又踈  
祝鮐馬用佞甯武豈真愚  
自乏千箱積誰令萬畧餘  
艾肥蘭蕙瘦饑饉竟何如

橋院

淹留歲云暮旅泊似幽棲  
鷗鷺如相識牛羊自不迷  
已煩陶令顧何必謝公携  
始覺吳儂健天寒更涉溪

題蘭陵稅官清輝亭

不謂人間世官居有此清  
山橫猶倒影鳥過忽遺聲  
倦



客方耽句高人不治名夜寒雲去盡對面月華生

阻雨

小雨妨幽事徜徉所得多前期操野艇亭午出煙蘿  
勝纔如許偷閒肯重過自憐詩酒涸無句敵陰何

才臣設席彥修來過仍陪表臣終日之樂豈易  
得也因賦

顧我非仙李知君實老彭承家羅玉樹潤屋起金羸  
世路嗟多事人生戒不情歲華將暮矣切勿訴深觥

彥修席上命賦何處難忘酒

何處難忘酒南州盜賊多黃巾方裂皆白日敢持戈不見韓擒虎寧聞馬伏波此時無一盞其奈客愁何

草飲招表臣才臣彥文道夫

愧匪屠門嚼且無金屈卮人生難得醉我輩不須辭山迴雲生谷林空鳥並枝前溪天欲雪為報戴逵知

清明日席上呈諸友

佳節年年好新春處處宜鶯花從自得蒲柳頓先衰事

過如驚夢愁來劇亂絲  
仙端可學吾願問安期  
飄零何足怪喪亂故應宜  
炙手寧為盛張羅未必衰  
篇章懷杜牧游說鄒袁絲  
鐘鼎山林事胷中自有期

弔彥深

已秀不成實長懷事可吁  
寧論日下鶴遽失掌中珠  
擾擾遭斯厄冥冥喪厥軀  
高堂親白髮淚眼尚青枯

水閣雨中

南國寒多雨溪山晝更晴  
風帆隨鳥上樵逕入雲行  
已

苦無饘粥猶欣見耦耕故園歸未得豺虎正縱橫

陪諸友赴城南妙智上人晚集

晚烟林際泊夕陽波上明天寒少佳色樹老無柔聲  
支郎頗好事我輩適同行劇論不知醉感時空復情

同士特似表過中峯餞似宗

舊好崔亭伯新交阮仲容招携來白水祖餞過中峯  
谷暖芊芊樹雲深杳杳鐘兵戈一分袂惆悵幾時逢

食鱸

設網機關密磨刀意氣麤令人思洛鯉媿客問江鱸  
豆麴偏相與橙虀未可無相從頻莫厭乘興不煩呼

呈似表

聞說煙塵近驚奔道路長人生何草草天意竟茫茫山  
鳥寒亡路溪花濕更香飄零值君子老眼慰悲涼

發永豐道中

雲斷山如拭秋明水劇虛濕煙蒙翠竹暝雨濯紅蕖茅  
舍真淳俗甕甕窈窕泥沽何須訪摩詰便是輞川圖

喜聞三十弟消息

喜得真消息仍安嶺表居  
深知道路遠不在信音疎  
荔子應憐汝擯擲敢笑渠  
一年省又盡兄弟意何如

武林偶作

江山天下勝北客興悠哉  
月上千峯雪潮生萬壑雷  
酒狂憐老大吟苦覺衰頽  
始滿平生願征帆未憶開

寄朱希真

故人俱白髮念子始青袍  
僕色新生敬詩名舊仰高  
天

寒西日瘦歲晚北風號望望滕王閣何時共濁醪

簡葉丞

傾蓋鄱陽彥孤芳且寄林一官方似水五字可兼金與世不求合開筵猶見尋何當鑄農器歸望故人岑

表臣檢校東臯雨中有懷詩以促歸

旅泊愁春雨春寒更北風雲山方秀發煙樹却冥濛念我携家客逢君足穀翁胡為在窮谷正渴一尊同

五言長律

留別范元長二十八韻

博洽人為史循良吏得師謀謨當啟沃出處繫安危鶚  
立通丹地龍章近赤墀諮詢唐典故筆削漢官儀結客  
多青眼承家竅白眉浩然無害氣汪若有容陂慎獨仍  
三省操危任百懼誰嘲玄尚白自信涅非緇俯仰俱無  
忤幽明兩不欺愛君心匪石憂國鬢成絲券外真毫末  
樊中足坦夷閉門因拂袖展卷代支頤遠覽迷千古高  
懷自一時海非蠱可測豹豈管能窺能事推天祿威名



到月支孔融微已晚安石起何遲不待南飛鴈貪懸左  
顧龜向來鸚鵡賦此去鳳凰池揭揭英靈氣巍巍柱石  
姿衮衣須我補霖雨更誰為賤子端何者先生頗識之  
幾年當顧盼今日倒鑪錘解榻徐生入彈冠貢子知青  
蠅休點污白壁漫瑕疵鍊句終乖律看書正闕疑地偏  
如有避交淡欲無私瘦馬終千里寒灰待一吹西江如  
可激畢命守軒帷

次陳叔易太湖二十韻

北客何來此浮生直偶然風飈從禹穴日脚近虞淵  
漁唱誰能問鷗盟我不捐燃犀怪可覩擊樹訊空傳  
釣石溫徐坐檣竿穩近聯波明疑練安山淨學眉連  
客上千履軍呼十萬鋌可思江柳下祇欠舞衣前  
鼓拖知無及乘查悵未緣遠中微隱樹閣外莽橫天  
縹緲湘靈瑟夷猶范蠡船健帆風作馭駭浪雪盈顛  
行鷺紛羣起孤鴻杳獨騫斷崖方怒吸淺瀨或勞牽  
夜泊星辰逼晴占日月偏幽姿閔蛟室神物護龍泉  
世亂甘淪隱塗窮枉

乞憐渚花迎日笑岸草信人沿頗欲追雙槳無因共兩  
舷時來如謝朓三復有餘妍

大人生日

天欲斯文起時將此道隆昭明應熊夢爽拔降神松業  
則真王佐猷當沃帝聰尊經獨韋氏識字必揚雄制作  
超前輩篇章萃古風不憂時易失却怕俗多聾日月曾  
襟裏江湖度量中讒深遭壁玷施博儘金空指日風雲  
會來時雨露蒙經綸觀世業潤色付宗工炯炯丹心壯盪

氤浩氣充檜壇休跨鹿丹鼎且蟠龍載誕佳辰及高門  
喜氣融捧觴欣有祝陳頌愧無功舞鶴窺筵淨偷桃照  
座紅孔庭詩禮集請訪吸川虹

失題

天上石麟墮人間瓊樹芳叔孫知典禮曹植有文章桃  
李蹊方盛芝蘭室更香榻先徐孺下書異鄴侯藏載世  
推能事當年亦寵光頗懷追潤色奚惜吐琳琅末俗元  
多忌冲懷竟兩忘由來高士駕不肯少年場鼎鼎文方

古魚魚道必昌仲山終補袞虞舜正無裳賤子虛蒙顧  
仁風實奉揚彈冠從入仕執戟且為郎欲作蟬遺蛻差  
同鼠耗倉窮途遭白眼永夜付黃梁尚齒三千客容窺  
數仞墻受知心有激欲報意何長皓鶴宜風露青松飽  
雪霜傾身挹東海再拜酌公觴

謁翁丈四十韻

之子儒林傑斯文國士稱詞章曹植擅典故叔孫能秉  
哲中逾曠為謙外匪矜世家非冠玉人物是壺氷海內

休方駕朝端且服膺五車俱可復萬頃不勞澄活國嘉  
猷告匡君重任勝側聞金作礪意在木從繩昔旅西雖  
鷺方觀南海鵬青冥翻蹭蹬凌厲失飛騰制禮初煩訂  
為郎頃見徵禰生宜獨薦文子要同升浪有羶供餌虛  
傳被襍綾可嗟懷白璧竟與污青蠅直作悠悠去從他  
袞袞登時情尚馳突吾道豈憑陵善舞須長袖良醫必  
折肱寧為棲枳鳳不作下韝鷹鄭谷成真隱蕭齋占上  
層華胥久無夢款段適堪乘種柳追彭澤栽桃學武陵

池涼蛙閣閣徑暖羽翬翬得句長鬚送敲門稚子應掃  
庭延墨客過寺折談僧賤子孤懷切窮途百慮烝待沽  
希善賈投分得良朋戎馬來何速烽煙見未曾神傷瞻  
雉尾愁絕望觚棱漠漠雖難問蒼蒼尚可憑人心無右  
袒天意有中興厭世思蟬蛻傷時泣土崩漁樵甘混雜  
貧病苦因仍更短猶為簿從聾也作丞依仁劇山仰飽德  
正川增舊事將誰語前非祇自懲緣危時過援扶老漸  
携藤駕義幾虛辱溫顏豈謬承醇醲須手漉撥剝賴觀

冒笑語朝曛隔塵埃肺腑凝尚期文字飲相對夜深燈



欽定四庫全書

崧庵集卷五

宋 李處權 撰

七言律詩

偉觀堂

孤煙落日對銜盃  
此觀人間亦偉哉  
樹色遠從江浦合  
潮聲低咽海門迴  
衣冠喜有承平氣  
賓客慚無賦詠才  
城闕鬱蔥人望幸  
五雲將擁翠華來

送楊充老

蚤接君家伯仲賢笑談吹斷各風烟人生俱是夢中事  
歸計却須沙上田悔有論心三尺喙恨無糊口一囊錢  
他時局罷樵柯爛小道誰知亦有仙

送李全甫

已斲長篇餞女生君猶從我覓詩行窮途白眼何須怪  
亂世蒼顏不足驚南國旌旗猶滅沒中原豺虎正縱橫  
蘇湖亦產人頭豆為問扁舟底遠征

送景荀

丈人能事見斯文世業家風盡屬君自許旦評方藉藉  
豈同時輩漫紛紛清於須水真堪挹秀自郎峯故不羣  
五馬雙旌何足道便看平步到青雲

送石與德孺

坡老仇池安在哉佛家驚嶺解飛來但令氣象侔衡霍  
可要孤高切斗魁渦處正堪承雨露浪中莫使長莓苔  
明窻淨几無塵入想對詩翁墨沼開

送表之

平生佳處在離騷怪我年來得此豪不信胸中橫太華  
試從筆下看驚濤門連止水心無競地接名山眼更高  
要是一時廊廟器莫將劉向比王褒

送徐漕

都門雪罷看楊柳濯濯風流已不羣千里澄清方有道  
十年出處不忘君新詩舊自開錦段醉面向人生纈紋  
我欲從公借餘地與傳名姓上青雲

送欽父

一見瓊林病眼開東南秀爽力能迴須知載腹五千卷  
受我澆腸三百盃可但世官從鳳沼要看人物上雲臺  
歌呼枉費談天口宜及中興國論陪

簡巽老

雨後綠陰無處著風前黃鳥為誰歌天為世亂相逢少  
子以詩鳴不遇多行在故人能健否瘴江逐客奈愁何  
典衣尚可供湯餅蚤作清涼肯重過

簡彥庸兄弟

五年蹤跡似浮萍  
豈料全家入畫屏  
春去水田方漫漫  
曉來山霧却冥冥  
可憐北客鬢毛白  
尚喜主人眸子青  
準擬豐年多釀酒  
正宜長醉不宜醒

簡辨老

松杉高下韻笙簫  
谷口鐘聲梵海潮  
秋氣作陰連蟋蟀  
夜寒隨雨上芭蕉  
身危甚幸依賢庇  
吏隱何須覓句招  
直待它年見鳬鳥  
始傳仙葉有王喬

簡立之

稅駕居鄰古寺中，高堂永日笑言同。  
山雲濃淡未成雨，溪竹飄蕭先得風。  
短髮只從今歲白，衰顏無復少時紅。  
君家釀熟能分我，一醉端令萬事空。

簡劉致中兄弟

祖筆摩空有賦聲，長揚羽獵舊齊名。  
頗推門第多人物，故作樓居遠世情。  
我輩一生悲短褐，君家五字倚長城。  
武陵欲借漁舟便，春水桃花不計程。

簡潮公

茗椀紋楸畫不譁心如出水妙蓮華喜君活計唯三事  
遇我人情似一家夜久竹聲聞雨過曉來山色看雲遮  
此身去國已千里回首中原猶暮笳

簡致中溫其

世情何怪白頭新豈料窮途復友仁一室他鄉春笑客  
半年行路雨欺人輞川詩說王摩詰谷口名聞鄭子真  
想是書機似圖畫雲峯矗矗水粼粼

簡蘇二丈



丈人清德冠儒林三世文章照古今  
節比松筠元自直氣含海嶽故能深  
篋中尚有為郎被堂上寧無化俗琴  
賤子飄零無死所可憐羈旅費黃金

池上書所見留別益謙

池上風烟故可人倦游老眼厭紛紛  
晴雲出岫似知我野鶴鳴臯疑是君  
可恨音書長契濶尚從盃酒見殷勤  
新詩準擬頻相寄獨學方當病寡聞

過德孺池上二首

樹色溪光五月寒  
幅巾藜杖接清懽  
吞聲鳥自屏中過  
倒影山從鏡裏看  
佳處唯堪著胸次  
平生久已付毫端  
向來未築沙堤路  
豈信東山有謝安

誰堪秋熱與春寒  
北客南州有底懽  
酒熟但招吾輩飲  
詩成莫與俗人看  
眼明白鳥清溪上  
心折黃鸝碧樹端  
口誦離騷手遮日  
夢魂不敢到長安

次韻德孺感懷

敝屣浮雲世所難  
誰堪走俗抗塵顏  
海鷗已激三千里

天馬終歸十二閑  
醉發杖藜雲逐逐  
香凝宴寢雨斑斑  
林泉久假皆吾有  
何必捐金更買山

梅二首

歲晚忽忽日復夜  
老禪相對口慵開  
夢歸千里幾時到  
香度一枝何處來  
世亂飄零少供給  
地寒潦倒無梯媒  
可憐七尺髯如戟  
媿負妻孥空撥灰

可憐映竹深深見  
似為催詩特特開  
湖上林逋今老矣  
揚州何遜未歸來  
前村欲雨鳩呼婦  
斷壠收晴雉應媒

幻境應當如是觀道人深悟叔池灰

溫其示梅詩用韻為謝兼簡士特

可喜劉郎鬢未霜能容宋玉近東牆自知老眼無春事  
誰意窮途得夜光前日桃園真有路何時蘭室可無香  
便須一醉經千日免作人間寸寸腸

潦倒誰憐五十霜登門可媿及肩牆銀鈎已作驚人勢  
玉唾何慳照眼光春醉燈前猶縱博夜闌帳底更添香  
阮生正作窮途哭漫道江南刺史腸

席上賦梅

桃李何須續後開  
芝蘭勝韻許相陪  
先春莫道無深意  
調鼎方知有大才  
南國正宜溪上路  
故園長夢竹間臺  
騷人不為尋詩句  
自愛幽芳特特來

和如祖弟二首

老來風味淡於秋  
媿負平生馬少游  
但得山雲供晚眺  
何須花雨作春愁  
新詩未省曾多見  
情話端知肯獨留  
政渴一盃澆磊砢  
書生何用玉為舟

綠樹黃鸝陰復晴春風何處不堪行野煙著草綿綿色  
江日浮花灩灩明故國音書添夢想異鄉節物減心情  
逢人盡說兵戈事始覺如今去就輕

叔易席上

何處春光最可憐仙山亭上碧巖前窮來更覺詩堪畫  
老去誰知酒可仙雲色弄晴花蘸水風光縱好柳拖煙  
左思近有三都賦誰與吹噓送上天

和賞卿席上之韻

翠竹丹楓共一村詩家得句轉清新已憐楚地梅知臘  
更想隋河柳欲春須信成名皆志士故應行樂屬吾人  
請君淬礪斑斑刃始驗儒冠不誤身

席上次表臣韻以遺明之仍督其和章

一日須傾三百盃新年物色興悠哉應憐遠客此流落  
故有幽人常往來楮刻三年殊未就詩成七步可須催  
平生信筆多狂簡從此方知所以裁

復次韻呈諸友

梅樹飄香酒滿盃時危風景亦佳哉橫筇有客挑錢去  
重擔誰家送米來雲色可憐談次改年華不奈鬢邊催  
蕭郎及我親書尺珍贈霜紉費剪裁

題畫卷

平生丘壑幾欲顛誰使老來逢鄭虔蒼須對我三千尺  
黑頭聽渠十八年已有霜雪入晏座寧無風雷浮屋椽  
箇中得句不敢吐可人何許心悠然

次韻呈德基兼呈王侍郎



書生卧病久無衣不意臨衰厭鼓鞀鄉信畧無鴻鴈到  
客愁惟有杜鵑啼誰憐彈鋏長依孟自不工等漫說齊  
我亦漂流費耘業看君文字照浯溪

臨川道中寄汪守

漸遠閩中地更平土風疎爽語言輕山濃不減嵩高翠  
溪漲渾如洛浦聲忽見槐花思舉子欲求螢火遺書生  
使君元是丈人行回首鈴齋空復情

奉懷養源士特似表

一坐關山百念灰  
德隣詩社許徘徊  
靜看林鳥銜花去  
寒覺溪風送雨來  
小阮有懷應種竹  
步兵無事且傳盃  
東牀坦腹真佳壻  
俗客多慙數月陪

懷清叙

夢想平生始此迴  
扁舟坐穩興悠哉  
陰陰樹底鶯聲切  
漠漠田中雨氣來  
亂世等閒凋鬢髮  
故園何處問池臺  
臨風不見高公子  
正渴論文共一盃

初至毗陵簡巽老時有所懷也

從來語默有千鈞  
亂後相逢氣益振  
好鳥開牕如應客  
清風挽竹故留人  
更貧豈顧墻間祭  
已老猶堪席上珍  
說到蒼梧淚橫臆  
皇天萬一照酸辛

觀潮二首

雪屋銀山滿上頭  
年年偉觀近中秋  
只言滄海無迴浪  
豈信長江有逆流  
一一檣帆如過鳥  
時時烟雨要沉牛  
青衫白鬢功名晚  
何日翩然范蠡舟

海舶忽驚風打頭  
觀瀾又破一年秋  
若為盡作盃中物

安得飛來枕下流  
豈計雙鳬兼乘鴈  
誰分去馬與來牛  
君王大業追神禹  
前日黃龍已負舟

送公卷赴金陵

惟魯家世頗堪論文采  
南豐實浚源德必有言人望重  
義形於色主威尊  
隨珠未可輕彈雀  
腐鼠從教競嚇鵷  
固是相門終出相  
魯公泉下有英魂

赴端禮之招道中偶成

月離于畢俾滂沱  
兆及豐年喜欲歌  
任有泥塗甘曳尾

更無波浪敢憑河老來酒量難酬酢閒裏詩情好琢磨  
晏子方觀久而敬人間炙手又張羅

道中口占呈翁養源

山行密雨來紛紛過午人家猶掩門水寒鷗鳥亦亡賴  
煙濕梅花如欲言頓忘客子懷抱惡可喜丈人顏色溫  
而今何計百年事乞與清詩當綠樽

呈九兄

我兄少有謫仙才襟抱於今得好開珠玉盡從談次落

溪山渾入句中來，弦歌小邑徒勞爾。  
松菊故園安在哉？有客漂流無稅駕。  
願將高義挽春回。

送二十兄還鎮江

此行檢校幽棲事，佳處知公故未忘。  
新筍定應過母大，舊松想亦及人長。  
老來對客須靈照，貧後持家藉孟光。  
世亂身危何處是，二年孤負北窗涼。

僕入月山介卿有詩見懷次韻答之

鼠輩欺人可奈何，我今行橐已無多。  
醉魂尚愛黃華谷。

歸夢長迷白石坡壯士陸沉無籍在道人香積有經過  
行朝近報仍安穩想見沙堤蹠玉珂

放步登遊回謝表臣遺酒

每愛前山似畫圖興來蕭散豈能無幽人著屐全忘懶  
野老闔門不可呼夕照暉暉明遠水春風莽莽著平蕪  
晴來已喜兒能賦軟脚仍煩送一壺

次韻民瞻端禮二首

枉報新詩錦不如句中風竹韻蕭疎頗分涇渭甘從子

不較窮通豈病予避地擬求千日酒誤身何用五車書  
誰人與作任公釣要使東人厭若魚

春雨既過雲未歸春寒屋下人無衣林如膏沐鵲鳩語  
草已怒生胡蝶飛中原格鬪幾時定北叟飄零何所歸  
我今始悟蘧伯玉明明四十九年非

次韻明孺見遺之什

世家傳子又傳孫豈較前身與後身知足已如倉庾氏  
忘懷真是葛天民騎鯨又見詩無敵射虎何須武絕倫



白屋朱門果非是萬錢日食是何人

次韻端禮見寄

自昔孤芳難寄林  
亂離漂泊却須禁  
春風不解迴雙鬢  
夜雨何堪攪寸心  
薄日花先懷杜曲  
清流竹色夢山陰  
從來玉石崑山火  
臭味多君肯嗣音

次韻樸姪見寄

鼙鼓聲中老戰塵  
故山歸夢月三更  
交情咄咄渾無寐  
學古悠悠浪得名  
鼇禁未容追世職  
熊轡何足語官榮

阿咸自是吾家秀始覺前人畏後生

簡郭令

煌煌世譜未應微直道高懷古所稀義往誰能單騎見  
幽尋坐想墊巾歸公庭此日棠堪憩仙路他年舄解飛  
顧我登門勤倒屣題詩愧匪謝玄暉

遊羅漢院因會張良輔大夫遂留於壁

寺古天寒杖屨清閒身合得此閒行破煙獨鳥驚人去  
積雪羣峯照眼明坐久泉聲醒客耳談餘茗味發詩情

張公語壯髯如戟蚤晚掀濤看斬鯨

謝養源惠茶兼陪士特清啜

仰止先生道不窮愛茶直似玉川翁  
靈芽動是連城價妙手纔爭一水功  
賤子詩書元未飽愁腸藜苒豈宜蒙  
高齋罷酒陪清啜歸御泠然兩腋風

和九兄賀二十六兄除大諫

祖德當年吐握勤諫垣人物典刑存在陰  
鳴鶴和有子產嶧孤桐枝見孫王室艱難欣得士  
世家矜伐敢援恩

清明謬謬平生事況乃中興闢四門

亨仲家兄擢居諫省詩以賀之

除書喜動薦紳顏穩上天池  
刷羽翰詩似少陵多教化  
文從太史有波瀾  
王庭看折朱雲檻  
儒巷聞彈貢禹冠  
兄弟相知夫豈敢  
會憐流落久江干

和表臣遺詩招歸仙隱

客裏栖栖嘆食艱  
桃源也復念人間  
九重鵷鷺思金屋  
萬里烟塵痛玉闌  
節物可憐梅競出  
浪萍長羨鳥知還

明朝跋馬歸仙隱健筆清樽儘傲閒

桐廬道中九日逢子公

三年客裏重陽節故典征衣共一杯鴈下紫萸能自好  
霜前黃菊為誰開中原豺虎定何許故國池臺安在哉  
山水中逢張學士慢扶雙槩不須催

景荀築室偉甚詩以贊之

將老從君得所圖交情及我歲寒餘適聞蔣詡開三選  
且喜揚雄就一區盡取風煙多種竹雅為窻室便看書

無錢可買墻西地，決背雲峯正起予。

中秋對月

露洗風吹未遽央，登山臨水總心降。  
明年此夕知何處，自古中秋不可雙。  
倚人琴溫似玉，更能詩酒浩如江。  
披襟拄頰渾無寐，斗轉參移莫下窻。

次韻四首寄德基兼呈侍郎公

溪流暴雨漲江同，咫尺西隣信不通。  
衰朽怕看青鏡裏，笑談猶近翠屏中。  
侍郎客到無奇禮，教授詩來有古風。

五載皇皇無稅駕我途正似阮生窮

蒙塵天子尚戎衣南國旌旗正伐輦國士傷時多刺怨  
王官失路有悲啼似聞叔向方圖晉亦報夷吾未去齊  
易地皆然心寸折釣竿吾欲老磻溪

書文車軌幾時同諸道惟聞羽檄通豈較北南聊暫寓  
若論賢聖且時中門前楊柳方垂雨溪上桃花尚舞風  
誰見東山謝安石命賓攜妓興何窮

紫鳳天吳在短衣亂來無日不鳴顰情隨野鶴雲間舞

夢繞城烏月下啼  
但得交情如水淡  
何須婦饌與眉齊  
抱琴載酒明朝去  
相送無勞過虎溪



欽定四庫全書

崧庵集卷六

宋 李處權 撰

七言律詩

寄呂季升

家世中朝第一流，郡符那得久淹留。  
詩情更入山水國，醉眼獨高煙雨樓。  
文舉定非餘子輩，元龍須向古人求。  
磻溪莫訝功名晚，今代何人有直鉤。

寄希真

金史四庫全書 卷六  
歲晚沉沉雙鯉魚交情可是白頭疎含香不見為郎後  
吐屑頻聞賜對餘內殿給乘千里馬大官供餌萬錢厨  
絲綸潤色須公等莫負平生載腹書

寄益謙

青鬢追隨到白頭中間憂患兩悠悠異時果有臧倉沮  
他日寧無雍齒侯舊隱重過三徑菊昔賢何在五湖舟  
一杯坐阻論文酒老懶閉門春事休

寄蕭國器

路貧不在虞庠炊調苦誰聞食菜時枉道故於尋尺見  
求人曷以斗升為夷吾不去齊何患叔何方來晉可知  
得士則興今亦古可能只直五羊皮

次韻表臣見遺喜歸

溪南渾似輞川居不啻當年卧草廬從昔金聲蒙晉詒  
至今汗血困鹽車端知將相真無種更喜才華甚有餘  
及此知機同免禍季鷹初不為鱸魚

自龍雲歸復次前韻

野寺經旬客寓居水聲山色是吾廬喜君能道碧雲句  
招我更煩黃犢車世路從來多險阻人生何必問贏餘  
況聞一諾千金重為激西江救涸魚

寄八十五姪

把玩新詩病眼開家風端有謫仙才祇應魚蟹留人住  
肯為溪山喚我來客舍更堪秋乍入鬢毛無奈老相催  
重陽共醉滕王閣此觀人間亦偉哉

陪德孺遊徐氏園池

十載吾廬信不通  
偶來仁里一尊同  
心驚人物如江左  
眼淨林塘似洛中  
著日晶明松下雪  
弄波蕭瑟竹間風  
澆花釀酒勤料理  
作記東園有醉翁

送粹伯弟親迎兼簡宣卿龍圖

悲秋宋玉已銷魂  
忍聽陽關共十分  
黃葉蕭蕭下寒日  
碧山迤迤過晴雲  
面如濯玉想無對  
氣已食牛知不羣  
問訊冰清懷大雅  
世家王謝屬斯文

春晚簡德孺

人生有酒卽佳辰忽忽園林已暮春  
雨後落花渾帖砌風前飛絮欲沾人  
我如放浪陶彭澤公是風流賀季真  
伊水崧雲在何處舊衣猶有洛陽塵

江上望靈石

似聞環佩雜簫笙  
昂立爭雄凜太清  
不與古今爭變化  
可能舒慘屬陰晴  
花開玉井難求種  
月下瑤臺但有名  
我亦生來未嘗屈  
敢持方寸並崢嶸

題祖道籃輿亭

淵明佳致在籃輿子以名亭德不孤異代頗能同臭味  
休年猶得見規模掛簷明月聊堪問入坐清風不待呼  
我欲典衣供一斗興來能賦百篇無

雨止送王侍郎

南州春老雨如絲刺眼青秧水滿陂樹濕黃鶯看更好  
溪渾白鷺立多時寸心折盡人千里霜鬢凋殘酒一卮  
我恐前身是匡鼎幸公不厭解頤詩

雨後凝秀閣口占呈子方

金匱山房詩集 卷六  
鑿石為渠水有聲四垣惟欠竹青青壁含霽月光千丈  
黛拂雲峯畫一屏香異定應來絕島茶甘初不藉中冷  
主人莫惜千金費更作飛樓擬摘星

妙空出示諸公詩卷次元韻

已著芭蕉喻此身木人花鳥豈知春他家定自無生滅  
此物何嘗有故新美玉不羞論瓦礫明珠終解照泥塵  
相逢一笑空歸去無語堪酬彼上人

送杲兄



衲子誰為蓋代豪生憎污俗紫方袍何須鑑水能知止  
未必歸雲可擬高虎穴等閒休探手龍泉取次莫吹毛  
君知五祖堂中老妙處何曾掛一毫

簡仁山海老用山谷贈靈源老人韻

禪闕無復老萊衣陟屺心摧怨夕暉泣血可憐猶不死  
望鄉無處欲何歸仁山老子方傳法枯木堂中久息機  
不見桃花并柏樹焉知四十九年非

遊羅漢院途中口占

休論至後日相催乘興籃輿到嶺隈  
風竹盡搖花玉珎  
雲山渾作爛銀堆  
須知此日逢僧話  
不減當年訪戴迴  
更喜彭君真我輩  
溪流渡馬肯相陪

送密老

歲寒紆錫辱西臨  
一笑忘言意自深  
怪石奇松那有價  
片雲孤鶴本無心  
上人已了洞山偈  
倦客方為梁父吟

枯木堂中無孔笛  
侍郎今日是知音

謂伺伯恭

寄曇晦二首

道無南北本同流  
遠赴叢林非所求  
到底此生俱擾擾  
從前何事不悠悠  
撞鐘擊鼓千人飯  
戴角披毛萬劫休  
蚤晚相從巖下寺  
對床清話雨飈飈

高僧闢館坐諸生  
夜久亦聞弦誦聲  
物外喜君能筆硯  
塵中媿我漫簪纓  
鉢飧尚返慈烏哺  
囊句時為老鳳鳴  
他日籃輿蓮社約  
祇應惠遠識淵明

喜雪

剪水適從天  
上手綴條  
不作世間花  
柴門有客方高枕

金石錄卷之四  
石鼎無人共試茶，清借遠山迎馬出。潤含修竹倚窻斜，  
令人却憶前年盛。輦轂歡聲百萬家。

戊申春登平山谷林二堂時茂世應時同行追

錄之

已過平山又谷林，登高能賦興何深。羣峯雪後皆浮玉，  
萬竹風前亦碎金。尚喜日聞黃屋信，可堪時動白頭吟。  
載遊不為壺觴事，攜取君家綠綺琴。

和懷英雪詩

路迷應有誤隨車望眼樓高莫可涯  
鶴駕鶯濤來浩渺  
瑤林瓊樹出交加  
廣寒玉兔翻羞縮  
上蔡蒼鷹正怒拏  
得句幽人方起舞  
夜寒明月在梨花

縱賞鉤簾面遠山  
蟹螯誰復問尖團  
飛花空自嫌春晚  
折竹應當念歲寒  
句法一如冰柱險  
書齋坐怪玉壺寬  
固知柳絮因風起  
何事青天亦受漫

謁王夏卿同過曼卿西軒留題

烟雲坐久濕人衣  
未覺城中有鼓鼙  
春到好花隨意折

日長幽鳥盡情啼貴公行色心方壯曠士閒居物已齊  
客子不知今夕夢故鄉何處是潛溪

下村水竹全類潛溪乃贊皇公平泉

別墅

### 車水

挽盡溪流沮如渾幽人晝卧懶開門諸鄰鵝鴨頓亡賴  
一夕魚蝦無半存及此焦枯方有禱從而暴殄豈堪論  
清漪綠竹城南路回首吾廬正斷魂

### 賦郭令南軒梅

世亂何堪歲月摧  
高齋始見數枝梅  
想他疎影橫溪過  
撩我清香入坐來  
老眼相看渾幾許  
幽人獨折未多開  
情鍾正屬吾曹事  
湔袞風霜破百盃

強立許酒不至因以趣之

北里溪山翠滿門  
似聞小阮甕浮春  
憐渠世亂益風味  
念我途窮多苦辛  
曠士可無千日醉  
浮生何事百年身  
臨風日日香穿鼻  
被縛甘為甕下人

雪後赴徐氏招呈德孺

金史卷之六  
卷六  
梅林樓閣上嵯峨淺綠浮漸亦自波莊叟夢中非一蝶  
右軍書次失羣鵝句從承柱思能苦人在玉壺寒更多  
宴寢凝香歸入夜流蘇帳小奈公何

雪後赴徐氏燕集

已雪猶陰更逆風斜川畧約斷行踪瑤臺貝闕三千丈  
玉樹瓊林一萬重學子經時無載酒隣僧過午未鳴鐘  
華筵此地成賓主孔翠屏深琥珀濃

醉後贈道夫



冰柱雪車元有聲五言早已號長城仙源迷路及春淺  
盜騎解圍空月明君豈似龜將曳尾我端如鴈不能鳴  
何人肯作千金貸賣藥江湖隱姓名

贈王師古

安城西有慶雲鄉山秀溪明出孟嘗每見朱門推愷悌  
遂令貧士有輝光君家太尉威名遠世譜觀文德澤長  
蒼狗白衣何足道古今興廢兩茫茫

寒食日同賞卿步江頭

樹舍新綠花事稀  
友生要我寧重違  
信脚一百五日出  
捫心四十九年非  
餒粥盤空家立壁  
松楸地遠涕沾衣  
弟兄不見音書絕  
植杖臨流賦式微

送希真入洛

一踏紅塵又五年  
倦游翻作送行篇  
春花秋月誰無分  
伊水崧雲自有緣  
我比嵇康猶更懶  
子追元亮故應賢  
因歸望訊忘機老  
買箇魚舟費幾錢

投建陽王宰

異時丞相柄文盟一顧曾空冀北羣  
鉉槩無功方笑我箕裘不墜蚤知君  
詩家只說王摩詰官況誰憐鄭廣文  
散盡黃金猶作客還來把酒對孤雲

酬辯老見遺懷舊之什

老去何堪行路難水霜幾晚見蒼官  
鱸魚南國無張翰妓女東山有謝安  
秉燭夜闌真是夢傳盃秋際若為歡  
吾徒恰似豐城劍光氣須從斗下看

題次真東軒

亂來身世任浮沉  
宴豆南州幾盞簪  
十頃菰蒲秋向晚  
一池烟雨夜來深  
詩成頗復蒙嘉賞  
酒熟時須共滿斟  
喚取陸郎攜綠綺  
小涼同聽越江吟

陪德久出郊

北客南征歲欲陰  
經行始滿愛山心  
霜溪見石如清洛  
煙樹參雲似故林  
昨日喜傳黃屋信  
餘生怕聽白頭吟  
公歸問訊庵中老  
隻履西來意淺深

謝翁士特惠筍

北客未識貓頭筍此來逢君欣得之出土好色已勝玉  
下箸珍味端如飴口涎饒嚼笑早計食指蠕動能前知  
小爐誰見親煨熟醉眼膏騰岸接籬

再到值雨

無復清池照病顏尚餘詩思發天慳西風似水初鳴葉  
細雨如塵不隔山歲熟自然民意樂時平更覺鳥聲閒  
江梅會見花敷雪劇飲須期倒卧還

偶至溪岸時當寒食書節物呈同行

風作山雲斷復飄沙平竹日影蕭蕭柔柔始葉蠶爭出  
淺水無魚驚獨翹白髮尋春悲去國朱門賜火望行朝  
游從此地多君子乘興來過不待招

止戈堂

坐見妖氛犯斗魁使君謀畧信雄哉冠如狐兔草間出  
兵似貔貅天上來門館無私千里靜賓朋多暇百壺開  
他年入數中書考始識汾陽濟世才

簡王夏卿侍郎

下村正與輞川同只恐桃源有路通  
山色直侵書幌裏花  
香盡泛酒杯中使君已致隨車雨  
丞相方來拔木風  
照席侍郎真玉樹慨然憐我坐詩窮

寄德器二首

清耽七盃愛盧仝富貴千金鄙鄧通  
新歲烟塵悲塞北  
舊時花鳥憶回中可能春雨如秋雨  
合是東風却北風  
尚喜張儀惟舌在百年從古沒終窮

客舍春寒數挽衣雲重雨濕不聞輦  
老妻未免負薪嘆

稚子何為索飯啼  
南地好山青不斷  
故園芳草綠應齊  
胸中磊磊但塵土  
慚愧錦囊無玉溪

後樂堂

去盡沙鷗水照空  
羣山濯玉有無中  
亂來更覺心情減  
佳處猶欣臭味同  
喜有清樽對雌霓  
霓慚無健筆繼雄風  
此行會見承平否  
歲晚飄零已秃翁

和與可見惠之詩

倚馬萬言纔一揮  
問年於我亦肩隨  
才華早擅鄉評在



人物行看國士知黃卷沉酣端有志青雲騰踏豈無時  
小人薄宦猶三黜方駕聊同柳士師

次韻巽老

風前竹榦須料理雨後蝸涎費掃除北客經過無好語  
南州騷屑少安居雄稱百萬空扛鼎功蓋三分漫顧廬  
識字信為憂患始鄰侯何必萬籤書

迂辨老

琳宮尚記昔年遊撲面楊花晚不收自倚釣魚終悟主

誰知射虎不封侯  
江湖已恨長為客  
風雨何須橫作秋  
未見故人心已醉  
更拚十日為君留

元長生辰

力扶吾道與斯文  
世職家聲蚤出羣  
欲致昇平寧舍我  
從來出處不忘君  
龍吟虎嘯彌千日  
兔髓烏肝恰一斤  
已格皇天方俾壽  
未須騎鹿上青雲

送蔡伸道

當年傾蓋便情親  
老去那知更賤貧  
松竹故園秋未老

溪山南國雨能新可憐作客身如夢尚喜傳家筆有神  
咫尺重陽歸務速吹花落帽要吾人

題南浦樓

此生何處是真歸俯仰人間念念非雨後溪山無限好  
煙中鷗鷺自由飛隻輪雙槳成何事白酒黃鷄可息機  
北客上來千萬恨故鄉回首夕陽微

七言長律

題錢德載雙清堂

誰識堂堂忠懿孫至今人物典刑存頗同陶令辭蓮社  
但學龐公隱鹿門醉枕泉香分石脉吟窻樹老出雲根  
喜携自有東山妓好事寧無北海樽服食方依煉丹井  
躋攀莫近洗頭盆秋風百本籬邊菊夜月三號澗下猿  
未怪頻穿康樂屐可須多羨辟疆園題詩我愧詞源涸  
作記渠能學海翻亂後煙霞真得計靜中丘壑要重論  
十年殺氣纏伊洛回首吾廬正斷魂

七言絕句

偶書三首

柴門如畫映山隈  
窈窕軒窗向水開  
想見幽人清徹骨  
松陰翠竹竹陰梅

碧澗濺濺遶竹林  
欲從源水阻幽深  
春風想有桃花樹  
更有漁舟可訪尋

朝雲漠漠雨絲勻  
山路清無一點塵  
桃李著花溪水滿  
斷腸何處故園深

雨止奉送制置侍郎王公

金史卷之六  
卷六  
已晴雲氣却濛濛坐見前山沒半峯報道名卿謁丞相  
不須行雨借蛟龍

簡辨老

晚風吹葉滿溪流落日孤雲萬里秋徑欲五湖尋范蠡  
醉攜西子上扁舟

戲辨老

不獨京塵解化衣秋陽流火樹陰稀折腰為米初何有  
親見淵明負弩歸

舟中偶書

兩山相對似香山  
灘響渾如八節灘  
安得高風從此去  
載醪猶是菊花殘

道中題梅

山家梅樹出疎籬  
好客慙慙折一枝  
直是老來風味薄  
而今相遇可無詩

雪中過伊南

低陰漠漠水漫漫  
楊柳如絲不忍看  
見說山前風更惡

杏花無處避春寒

促夢粥釀

客舍猶尋未見書  
鄴侯何止萬籤餘  
君家釀玉推能事  
得及重陽把盞無

題湘園

當年此地勤花竹  
景物方成姓又移  
儘愛芙蓉照秋水  
倚風懷往亦多時

赴端禮之招道中



高人折簡苦相催要及春風把一盃花柳溪山寒食後  
雲中何似雨中來

次懷英韻

亂來身世美沙鷗雪後溪山紫兩眸不用東床呼外舅  
當年雅契在仙舟

陪德孺遊徐氏園池

禽魚花竹靜相參溪雪融春青出藍月下醉歸休秉燭  
要將清夢過江南

和翁子秀夜過溪橋韻

千里無雲湛九霄  
月明花露滴春橋  
何時心緒如楊柳  
笑倚春風萬丈條

原跋

文妙物也以變故奇煙雲杳靄之有無江濤出沒之荒  
忽魚鳥飛潛之下上晦冥朝暮姿態呈露愈變而愈無  
窮茲亦奇已而文之為物實與之俱爰自鴻荒以還厥  
裁不一畫焉而神疇焉而章筆焉而信歌詠焉而莊皆  
以自然之天錯綜經緯而萬物之變形焉非特不能不  
為之亦莫之為而為者也然則文之由來尚矣世去古  
遠人不克聖而物之精華不可以終秘梁臺之選吳興

之粹蟬鳩奕代有作者燦然珠琲之溢目冷然笙簫  
之入耳也源派雖殊終會于一至於枚別諸家銖考殿  
最若十指然其短長洪纖卒不可得齊豈人之有能否  
抑其習有工拙與建安七子時有所取李杜文章羣兒  
謗焉要以其全者責之故難也雖然不更三聖無以見  
集成之大不歷三變無以知一出於正者之為粹然我  
朝當五季之橫流質窮弗反承乾棟絕坤維摧陷廓清  
之功與文俱高崑體雖張不能杞其駕使勿馳也於是

穆伯長尹師魯歐陽永叔輩為之導流揚波而古文篇  
章始得助而中興列聖相承重熙累盛先正李公淑以  
文章伯為時宗主高文大冊竦石五色天下謂之邯鄲  
家雲來初昆世載其德不墜至崧庵乃復以其餘力游  
戲翰墨之場輩行推高表表愈偉而其富且特出者最  
見於古律詩淳淡典雅一唱三嘆如融怡帝鄉日浩蕩  
天街春則鎬京繼代之作也相逢便論心已別更回首  
則伐木故舊之感也還將太古意一洗萬境寂真足以

見其文之不苟作如杜子美穿花點水等句姑將置之不肯一吐其自序以三百篇為家傳之懿決非貌得之端公既標識其次而綴語編末不鄙命予予為述文章之妙雖選粹所集少有其全者獨我朝之盛幾焉耳矣每歎前輩之於家學守之彌謹如羲獻書如班馬氏史如專門名家經如世將用兵行師法其率履不越蓋如此端公方以盛名頡頏斯世每一語出意外驚人是能其家者今將恢壯圖挽洪流鋪張潤色以復我祖宗

之舊而挈之唐虞三代之上斯文之責實於此乎在時  
宋淳熙庚子東陽邵驥跋



--	--	--	--	--	--	--	--